

BAB 6

PENUTUP

Kajian terhadap makna tersirat ayat tanya dalam surah al-Naml dapat memberi hasil yang bermakna terhadap perkembangan bahasa dan pentafsiran al-Quran di samping memberi kepuasan kepada pengkaji dengan penerokaan dan penemuan baru dalam berbagai bidang ilmu pengetahuan.

Kajian ini tidak seharusnya sekadar ini sahaja, malahan amat diharapkan agar diteruskan oleh pengkaji-pengkaji seterusnya. Banyak lagi perkara-perkara baru yang boleh ditimbulkan dan diketengahkan.

Walau bagaimana pun hasil kajian ini dapat dirumuskan seperti berikut :

6.1. RUMUSAN AYAT TANYA DALAM SURAH AL-NAML.

Secara keseluruhannya makna tersirat bagi 31 ayat tanya dalam surah ini adalah untuk :

a) Memberi amaran.

b) Melahirkan perasaan hairan.

- c) Mengingkari.
- d) Mencela.
- e) Meminta pengakuan.
- f) Menguji kepintaran.
- g) Menasihati.
- h) Mempersenda.
- i) Menggalak supaya berfikir.

Perkara pokok yang mendasari ayat-ayat tanya ini adalah untuk memperingatkan manusia tentang azab Allah di dunia, memperihalkan nikmat anugerah Allah kepada Nabi Sulaiman, menentang kemungkaran, menyeru supaya beriman kepada Allah dan merenung kekuasaan Allah.

Ayat-ayat tanya ini berfungsi dengan sempurna dalam menangani persoalan-persoalan yang disebutkan tadi dan dalam usaha memberi kefahaman kepada pendengar dengan mesej tersirat masing-masing, yang mungkin tidak dapat disampaikan dengan gaya bahasa yang lain.

Kekuatan ayat tanya terletak kepada pendekatan menyampaikan maksud secara tidak nyata di awalnya, mengajak pendengar untuk berfikir dan merenung diri dan seterusnya memperakui jawapan seperti mana yang diingini penutur.

Pendekatan ini dianggap berhikmah dan menyentuh hati dan perasaan pendengar kerana pendengar dalam konteks mencela misalnya tidak disergah dengan kata-kata yang keras, sebaliknya makna celaan lebih mirip kepada satu pertanyaan yang boleh diterima oleh sesiapa pun.

Keindahan seninya pula terletak pada menyampaikan maksud secara halus dan terselindung di sebalik perkataan dan nada suara tanya yang boleh disesuaikan dengan keadaan sebenar.

6.2. MASALAH KUPASAN AYAT TANYA DALAM SURAH AL-NAML DAN SARANANNYA.

Untuk mengupas maksud tersirat ayat tanya dalam al-Quran dengan detail dan jelas, ia amat memerlukan kepada pemerhatian yang jitu, kesabaran, menyelamai makna perkataan, mengaitkan makna ayat dengan makna umum yang menjadi latar belakang kepada ayat.

Walaupun begitu, terdapat perbezaan pentafsiran, terhadap makna tersirat ayat tanya seperti mana yang terkandung dalam kitab-kitab tafsir. Keadaan ini berlaku kerana

perbezaan pandangan masing-masing dalam mengurai maksud ayat tanya, yang berpunca dari perbezaan asas yang menjadi sandaran kepada penafsir dan latar belakang ilmu mengenai ayat tanya seperti yang diuraikan sebelumnya.

Tidak dapat dinafikan bahawa sesuatu ayat tanya mungkin mempunyai lebih dari satu maksud tersirat. Dalam soal ini pentafsir seharusnya menonjolkan maksud yang lebih nyata dan menyertakan maksud kedua.

Dalam soal mentafsir ayat tanya dalam al-Quran, pada pandangan penulis tidak seharusnya dihurai secara kefahaman sahaja, dengan mengenepikan kekuatan dan keindahan ayat tanya.

Pentafsir harus menterjemahkan ayat berdasarkan ia merupakan ayat tanya, di samping menghuraikan maksud secara mengambil kefahaman dengan dijelaskan maksud tersirat bagi sesuatu ayat tanya itu.

Pentafsir harus ingat bahawa beliau berhadapan dengan kalam Allah yang bersifat mu'jizat. Sebagai seorang manusia, banyak lagi rahsia i'jaz al-Quran yang masih kekal menjadi rahsia kepadanya.

Untuk menyelami rahsia ini, beliau amat memerlukan kepada kekuatan ilmu dan keimanan yang tinggi . Pentafsir akan merasai puas apabila dapat mempersempitbahkan

pentafsiran al-Quran dalam bentuk mengupas segala permasahan yang berkaitan dengan bahasa, makna dan hukum-hakam yang terkandung di dalamnya.

Mengkaji peranan bahasa dalam al-Quran seperti mana dilakukan dalam kajian ini dapat memberi kepuasan kepada pengkaji dan dapat menganugerahkan sesuatu yang berharga kepada perkembangan ilmu dan bahasa.